

集古官印考

集古官印攷卷十四

嘉定瞿中溶編輯

男樹鎬校刊

桂氏

右臨陽君璽案臨陽君不知時代而攷戰國及楚漢之際有雜號封君但加美號爵封不盡皆有邑土者如孟嘗信陵等五君及商君馬服君趙奢趙括靖郭君田嬰田廣野君奉春君婁敬稷嗣君叔孫通賢成君負武安君白起蘇昌文君宣陵君皆灌之類甚多並見戰國策及史

記又兩漢書傳所載如王莽封其母爲功顯君及外戚男女賜號稱君者亦甚多也說文云璽王者印也所以主土從土爾聲籀文從玉此印文云璽不云印疑是功顯君太后等之印與梁王后璽略同也

大年據印章摹補

金氏龜鈕

右任武君印無攷同上

右陽平君印無攷張叔未所得案漢書地理志陽平屬東郡續漢書郡國志同云侯國攷戰國楚漢之際封君或稱邑名如平原君長安君之類亦不少而以封婦人者更多如蕭何妻曰鄼君周廣母曰野王君及董卓母曰池陽君而和帝王皇后母曰平原君安思閭皇后母曰滎陽君桓帝鄧皇后母曰長安君靈思何皇后母曰舞陽君之類亦不可勝紀並見於兩

漢書章懷注滎陽君引續漢志曰婦人封君儀比公主是也

桂氏

右印文曰河南君丞無攷案地理志有河南郡河南縣郡國志同光武都雒陽遂改郡爲尹此印當與前同而云丞者或亦同公主之有湯沐食邑而如侯國之有丞與平的國丞金鄉國丞之印同也

大年據印正摹補印史亦有案繆篆𢉰下注河南

君丞而審印文實河南尹丞繆篆作君傳寫誤耳

桂氏

右印文曰中山壽王案中山國漢高帝置印文止當云中山王印而云中山壽王無此體也必妄人僞作者

大年據明陳氏鉅昌古印選摹補印藪印範印正印則並有

式芬案漢人多有以壽王爲名者此私印也

桂氏

右賜宜王印無攷

大年據印統摹補案印統尙有賜未央印王海賜
姓齊大夫簡子賜之後繆篆又有曾宜王印則賜
宜王乃姓名

右脩禮侯印

桂氏

右□川侯印川上一字磨滅不可辨

龜鈕通體塗金

右太原長公主章案此疑唐以後私印

桂氏

右印文曰獬豸相案獬豸無攷又無印字止以三字爲文與隋以前制皆不類獬豸桂氏有說而亦未能定其時代或是外國物

大年據印史摹補

顧譜

右印文曰永□山國相印案永下一字右旁漫滅又王國不當有山字疑亦外國印也

桂氏

右五郎將印案漢有五官中郎將而此稱五郎將去
官中二字難解

大年據印正摹補印史亦有

范氏龜鈕

右尙書大夫章此疑隋以後私印

桂氏

右禁門大使章無攷

大年據印正摹補印史亦有

桂氏

右公舍丞印無攷

大年據印章摹補

桂氏

右酒官令印無攷後漢書鮮卑傳言武帝時興鹽鐵酒榷之利章懷注榷專也官自賣酒人不得賣也則漢時亦可有之矣又隋書地理志河東郡河東注有酒官

范氏鼻鈕

右印文曰樂大官令

楊氏譜

右振安將軍章無攷然必非隋以後印

右□武將軍章

右游部將軍章案游部將軍無攷然亦非隋以後印

右禽適將軍章案禽適當卽擒敵也適敵古通然擒
敵將軍亦無攷印文甚古恐非漢魏以下物

桂氏

右通威將軍印無攷

右□鋒將軍章鋒上一字漫滅不可辨

右建中將軍章攷列代史志有建忠將軍而無作中者然形制字文皆古非隋以後物

印統

右印文曰中建將軍無攷

顧譜下同

右換列將軍之印無攷下印大而文亦異下印已見
范譜云龜鈕

右雲騎將軍之章反文

右印文曰撫戎司馬當是撫戎將軍之司馬而撫戎將軍無攷

查氏顧譜鼻鈕

右印文曰漆園司馬攷史記老莊列傳言莊周嘗爲蒙漆園吏張守節正義括地志云漆園故城在曹州冤句縣北十七里此云莊周爲漆園吏卽此按其城

古屬蒙縣云云然不當有司馬疑是後代人私印

范氏鼻鈕

吳氏

右印文曰膠西司馬攷漢文帝分齊置膠西國宣帝
更名高密而王國郡皆無司馬此未知何屬范譜有
此印正同云鼻鈕

顧譜

右印文曰建安司馬案建安郡吳置然隋以前郡國

皆無司馬而後代每以爲郡丞之通稱此疑爲後代私印

印存顧譜

右印文曰無當司馬無攷已見嘯堂集古錄

查氏

右印文曰方俗司馬無攷

右印文曰羅候司馬無攷范譜有此印云鼻鈕文正同當卽范所藏之物也

右印文曰五度司馬無攷范譜有此印文正合當卽范所藏物

右印文曰□賜司馬賜上一字不可識案其文不古

右傳戰司馬印無攷印文五字或是王莽時物

右印文曰程佰司馬

右印文曰□中司馬

顧譜

右印文曰常山漆園司馬案漆園司馬已見前此多
常山二字攷漆園爲蒙縣地蒙縣漢屬梁國不屬常
山郡桂氏繆篆分韻園作園引篇海予案園字已見
六朝碑

范氏鼻鈕

右印文曰無當突陣司馬案無當司馬已見前陣上一字桂氏分韻摹作罔而誤釋爲究攷隋志載梁有突騎將軍後齊有直突都督蓋皆取衝突之義也

顧譜

有印文曰方俗破虜司馬案方俗司馬已見前破虜乃將軍之號而云方俗破虜則未解范譜有此印文

同云鼻鈕

楊氏譜印存

右印文曰落索平難司馬案印文頗工整非後代物
范譜有此印云鼻鈕文與此無異當曾爲范所藏也

右墨兵左軍司馬章攷宋書百官志有左軍將軍及
右前後三將軍云魏明帝時有左軍將軍然則左軍

魏官也又言晉景帝爲大將軍置掾有兵曹其後又有墨曹與晉志皆不合

桂氏

右司馬將印案將在司馬下古所未見

右右司馬印

右左部將印案左部當亦部將之名目然無攷印爲
張叔未所得

右軍假尉印

桂氏

集下卷五 卷一四 三
右印文曰富安長史案長史爲將軍等之屬官而富
安無攷宋書州郡志言上庸郡有安富縣晉太康地
志永初郡國何徐並作富安然不當有長史或是五
等封國之屬官

大年據印正摹補

右印文似□麓太守章首一字不可識形制大而文

多繆似是魏晉以下物無攷

吳氏

右印文似南無州太守章此印與前略同而南無州亦不見於史志范譜有此印略同云龜鈕當先爲范所藏也

桂氏

右印文曰武陵郡長案隋以前縣稱長而郡稱太守

此云郡長恐後代私印桂氏繆篆補有潁州郡長私印云潁州後魏所置卽秦之潁川郡則此印或其類也

鼻鈕顧譜

右印文曰彭城醫長此非古印乃近代物

顧譜

右農前丞印無攷已見嘯堂集古錄此與下農府丞

疑皆代郡農長之類

顧譖壇鈕

右農府丞印無攷

桂氏

右印文曰下□左丞案丞分左右無攷

右櫟陽護印

顧譜

右印文曰聚降尉右前候此當是都尉之屬官而與
敦德尹曲後候壓戎甯曲前候二印略同

楊氏譜

顧譜

右濟南侯印案濟南乃郡國名郡國有侯未聞蓋誤
以侯爲侯乃五等所封之印邪又一印文少異

金氏鼻低似臺鈕

右印文曰穀成行尉大夫案穀成漢縣續志成作城
晉志屬濟北國行尉大夫無攷四圍及中皆有線界
與歷代官印小異然色澤甚古不似唐以後物

右印文曰□州刺史印

式芬按此雲州刺史印

顧譜鼻鈕

右尙□令印尙下一字不可識已見嘯堂集古錄亦作君又一印似君而非君

右□安令印案安上一字繆篆不可識張叔未所收

印存

右□鄉令印篆文甚繆鄉上一字不可識

右印桂氏釋爲木羅令印木羅無攷

印叢瓦鈕

右源長之印源長無攷或是後代人名私印

鼻譜顧鈕

右趙甯長印趙甯無攷

顧譜鼻鈕

右豐德長印豐德無攷

顧譜

右綏逋長印綏逋無攷

顧譜鼻鈕

右□甯長印甯上一字右旁不可識

顧譜鼻鈕

右□平長印平上一字當是元元平無攷

右離水長印離水無攷案漢書地理志蒼梧郡武帝元鼎六年開莽曰新廣屬交州有離水關豈關官亦止稱長與前陝谿關長同邪

右衝□長印衝下一字似開然無攷

桂氏

右故部長印無攷

桂氏

右小單長印無攷

桂氏

右走翟丞印走翟無攷

右印文曰臯谿左尉案臯谿無攷

桂氏

右印文曰復德左尉復德無攷

大年據印範摹補印統印原金索並有

右印文曰□貴左尉

右印文曰綏承右尉綏承無攷

印存

右左右印信篆文頗佳而未知所謂

顧譜

集古官印攷

卷十四

三

右萬安使者章無攷或是隋以後私印

查氏

右閣門漢印不知所謂

印叢橋鈕

右印文曰里中萬歲文與篆法俱甚古但未知所謂

桂氏

右良里單印同上

右宗親彈印同上

桂氏

右單尉爲百衆刻千歲印同上

范氏龜鈕

右印范釋作禾成見平□侯道

查氏

右西□里印西下一字右旁不可識同上

右新昌里印同上曲阜顏教授

崇禎

藏案其形制長

當爲後代人印山左金石志以爲漢印非也

桂氏

右左猛之印無攷

桂氏

右中猛之印無攷

大年據印叢摹補印藪印範並有案中左右皆姓
猛則名也

桂氏

右印文曰左猛無攷

大年據印選摹補印數印範並有

桂氏

右印文曰右猛同上

桂氏

右印文曰中猛同上

查氏

右倉印集古印譜曰銅甚薄分其長而三文隆其中一段比印信厚爲鈕色如碧玉鈕左一淺竅不透右按漢制太倉令丞主受郡國轉漕穀中溶謂此與後庫印皆長而兩字恐非隋以前物集古印譜亦有此印文又不同翁氏兩漢金石記摹有圓印及史印略與此同引楊子法言五兩之綸半通之銅注曰有秩

齋夫之印綬印綬之微者也後漢書仲長統昌言曰
身無半通青綸之命注十三州志曰有秩齋夫得假
半章印

查氏

右庫印同上

顧譜

右印文曰稻農左長文雖四字其形亦長與隋以前

諸官印不合恐是後代物

集古官印攷卷十五

嘉定瞿中溶編輯

男樹鎬校刊

唐

右觀陽縣印据陸氏紹曾印本摹入其下注云銅印
環鈕印上面有正書十字云開皇十六年十月五日

造按隋書地理志觀陽屬東萊郡後周廢開皇十六年復又分置牟州大業初州廢中洛攷觀陽本漢縣後代皆相承有之唐書地理志萊州東萊郡雖無觀陽然其前登州東牟郡牟平縣注言武德四年以牟平黃置牟州六年以登州之觀陽隸萊州又於文登縣注言武德四年置登州以東萊郡之觀陽隸之六年析置清陽廩定二縣及州廢省清陽廩定以文登來屬然則唐初亦有觀陽縣明矣至武德六年始析爲二縣改其名曰清陽廩定故唐志不列觀陽縣也

自漢至隋官印皆小如私印篆用白文且人各一印
佩而不用去官亦卽攜歸不似唐以後之流傳交替
用爲官之文憑也予先見雞林道經略使印已爲之
攷跋矣後見此印形制字文皆與彼印彷彿當爲唐
初之縣印無疑据雞林道經略使印背竝未有字可
證唐時改荆官印尙無鑄印專司之職不勒年月於
背與後代之制不同不學之徒見其背無款乃妄据
隋志補刻開皇年月日耳

右雞林道經略使之印何君夢華以印本見示予意
此爲唐印質之外舅錢少詹先生亦以爲然頃檢新
唐書高宗本紀上元元年二月壬午劉仁軌爲雞林
道行軍大總管以伐新羅又東夷傳新羅龍朔元年

法敏襲王以其國爲雞林州大都督府授法敏都督
咸亨五年納高麗叛衆略百濟地守之帝怒詔削官
爵以其弟右驍衛員外大將軍臨海郡公仁問爲新
羅王自京師歸國詔劉仁軌爲雞林道大總管雞林
道之名始見於此唐制邊防戍兵總名曰道道有大
將一人曰大總管已而更曰大都督而沿邊則別置
經略使以領之雞林道始設於上元元年則此印想
卽其時所鑄也予所見宋元官印不下數十種而唐
印則僅於范隋朱巨川兩誥身所摹得窺厓略今見

集古官印攷

卷十五

三

此印如獲珍珠船矣

右雲州節度使印文多繆篆節度二字幾不可識予
反覆推求始悟而定之攷雲州乃古之雲中戰國時
爲趙地武靈王置爲雲中郡据遼史地理志言西京
唐貞觀十四年移雲中定襄縣於故北恒州開元十
八年置爲雲中州天寶元年改雲中郡乾元元年曰
雲州乾符三年大同軍節度使李國昌子克用爲雲
中守捉使殺防禦使據州以聞僖宗赦克用以國昌
爲大同軍防禦使不受命廣明元年李琢攻國昌國
昌兵敗與克用奔北地黃巢入京師詔發代北軍尋

赦國昌使討賊克用收京師功第一國昌封隴西郡王國昌卒克用取雲南旣而所向失利乃卑詞厚禮與太祖會於雲州之東城謀攻梁不果克用子存勗滅梁是爲唐莊宗同光三年復以雲州爲大同軍節度使晉高祖代唐以契丹有援立功割山前代北地爲賂大同來屬因建西京又攷新唐書僖宗紀書乾符五年八月大同軍節度使李國昌陷岢嵐軍又書中和元年四月赦李國昌及其子克用以討黃巢而方鎮表言乾符五年升大同軍都防禦使爲節度使

中和二年更大同節度爲鴈門節度四年河東節度
領雲蔚二州可知大同節度使卽李國昌一人爲之
後因其子守捉使克用叛降國昌仍爲防禦使國昌
不受命後又被攻敗而走印文曰雲州節度使卽大
同節度使也則此印之遺疑卽李國昌敗走所棄之
物故列於唐末宋史地理志云雲中府唐雲州大同
軍節度石晉以賂契丹號爲西京宣和三年始得雲
中府武應朔蔚奉聖海化儒媯等州所謂山後九州
也唐書地理志但言雲州雲中郡開元十八年復置

無乾元名雲州之文乃遺漏也而歐陽忞輿地廣記則云貞觀十四年置雲州天寶元年曰雲中郡升大同軍節度似皆非是丁酉七月吳江楊龍石澣以舊印本見貽不言背有年號款識亦不知今在何人處

右行軍都統之印据通州馮晏海鵬金石索摹入云
泗水王孝廉家榕所藏有鐫武成二年行軍都統之
印馮据唐書逆臣傳謂李希烈嘗僭號建元武成因

定爲唐物予攷都統名官起於唐天寶末又希烈傳言德宗時進希烈南平郡王漢南北招討處置使又拜諸軍都統則於僭號建元後其軍中仍設都統之官亦可有之事惟唐印留傳於世甚少未見有鑿紀年款式者而攷以武成紀元始自六朝周世宗至唐李希烈之後又有蜀主王建於唐末亦以武成紀元至三年又攷行軍之稱乃帝王親征或帥臣奉朝命領兵開府方有其名希烈旣爲逆臣僭號後設官分職儼同帝王竊踞一方親自攻略不當有行軍之稱

至王建於唐昭宗時雖拜永平軍節度使充行營諸
軍都指揮使又其時唐署韋昭度爲行營招討使蜀
机云建發兵劔南昭度於城東顧彥朗爲行軍司馬
置行府以建爲衙內都指揮使又其後天復中封建爲蜀王立行臺於成都似行營
行臺卽可稱行軍然至唐亡建元武成之後似亦不
當有行軍之稱且其時竝未見有都統名目也而攷
金史言猛安之上置軍帥軍帥之上置萬戶萬戶之
上置都統又言萬戶爲一副統兩副統爲一都統故
金時都統之官最多元初亦有萬戶之官而予嘗見

有行軍萬戶所印此印文有行軍二字之證又以所見金時都統等各印校之此印形制字文靡不相似竊疑此亦金時官印後人欲僞爲唐五代物乃補鑿年號款識以高其聲價也惟因未見印文真蹟姑依馮說列於唐印之後以俟續爲攷定耳

右印文曰步從弟弑軍記見楊遵雅集古秦漢印譜
案此印文與邊俱瘦而細其篆體疏散圓勁與宋以
後之官印不類當是唐末五代時物予攷新唐書兵
志言乾甯三年李茂貞再犯闕昭宗幸華州左右神

策軍中尉劉季述王仲先以其兵千人廢帝幽之季述等誅昭宗召朱全忠入誅宦官宦官覺劫天子幸鳳翔全忠圍之歲餘天子乃誅中尉韓全誨等二十餘人以解梁兵乃還長安於是悉誅宦官而神策左右軍由此廢矣諸司悉歸尙書省郎官兩軍兵皆隸六軍而以崔允判六軍十二衛事六軍者左右龍武神武羽林其名存而已自是軍司以宰相領及全忠歸留步騎萬人屯故兩軍以子有倫爲左右軍宿衛都指揮皆汴卒崔允乃奏六軍名存而兵亡非所以

壯京師軍皆置步軍四將騎軍一將步將皆兵二百五十人騎將皆百人總六千六百人番上如故事乃令六軍諸衛副使京兆尹鄭元規立格募兵於市而全忠陰以汴人應之允罷以宰相裴樞判左三軍獨孤損判右三軍向所募士悉散去全忠亦兼判左右六軍十二衛及東遷唯小黃門打毬供奉十數人內園小兒五百人從至穀水又盡屠之易以汴人於是天子無一人之衛昭宗遇弑唐乃亡而攷昭宗紀天復元年二月裴樞爲戶部侍郎同中書門下平章事

三年正月戊申殺左右神策軍護軍中尉韓全誨等
壬子工部尙書崔允爲司空兼門下侍郎同中書門
下平章事甲子幸朱全忠軍庚午崔允及朱全忠殺
中官七百餘人辛未允判六軍十二衛事二月崔允
爲司徒乙未清海軍節度使裴樞爲門下侍郎同中
書門下平章事十二月辛巳禮部尙書獨孤損爲兵
部侍郎同中書門下平章事天祐元年正月乙巳崔
允罷裴樞判左三軍事獨孤損判右三軍事己酉朱
全忠殺太子少傅崔允及京兆尹鄭元規等戊午全

忠遷唐都于洛陽二月戊寅次陝州朱全忠來朝三月丁未朱全忠兼判左右神策及六軍諸衛事閏四月壬寅次穀水朱全忠來朝甲辰至自西都八月壬寅全忠以兵犯宮門是夕帝崩則此印文所謂步從第一軍者當是天復三年正月崔允判六軍十二衛事時奏置六軍軍置步軍四將騎軍一將之步將弟一軍之記也是時倉卒權置已不及分將給印故每軍但給步軍騎軍各一記以別之耳未幾朱梁篡唐時當亂離之際此印因遺失入土後代人於土中掘

得乃流傳於世而爲楊氏收入譜中也集古印譜始於楊氏楊氏名遵雅字宗道元之浦城人也王常及顧從德編校之印藪厥初卽襲其名并載其譜之襄陰王沂京口俞希魯會稽唐愚士豫章揭法各敘及金華王禕贊番陽周伯琦題詞言之詳矣嘉慶初予在同里從內弟錢同人處見其譜一冊皆係朱印元本匆匆未及盡摹而此印及都統所短字印係後代大官印尤難得也其冊各印下皆無注釋有無背文年月款識皆不可知矣然此尙係元物爲古印譜之

屢傳於世者不特楊宗道當時所見此印其存亡不可問卽欲再見其殘譜亦不易矣故爲詳攷而摹其文以表出之

右拱聖下七都虞候朱記背左右有正書款二行云

端拱二年四月鑄中又一上字山左金石志云孔戶

部

繼涵

曰都虞候在京在外皆有之品秩尊卑不一

惟殿前司爲最所稱三帥者都指揮使副都指揮使
都虞候也都指揮使以節度使爲之副都指揮使以
刺史以上充故元祐七年王巖叟言祖宗以來三帥
不曾闕兩人若殿帥缺難于從以超補姚麟係殿前
都虞候合升作步軍副都指揮使而馬步軍捧日天
武左右廂等各有都指揮使每軍有都指揮使都虞
候每指揮有指揮使副每都有軍使兵馬使十將將

虞候承局押官此十都虞候蓋每軍之都虞候十之云者殆猶步軍之十將爾其曰拱聖兵志云乾德中選諸州縣兵送闕下立爲驍雄後改驍猛雍熙中又改拱辰旋改拱聖此印背所鐫乃改拱聖之後至政和四年詔殿前都指揮使在節度使上副都指揮使在正任承宣使上殿前都虞候在正任防禦使上侍衛親軍其馬軍都指揮使副在正任觀察使上馬軍都虞候在正任防禦使之上步軍都指揮使副同馬軍都虞候而開封府都虞候月給廿千六軍都虞候

月給五千是其爲師爲校品秩截然京外職同及諸軍將校給朱記其制長一寸七分廣一寸六分中興以後亦長官曰印僚屬日記而楊巨源傳倒用含江司朱記亦卽其證矣中溶案宋太祖爲周世宗殿前司都虞候故兵制有殿前司與侍衛司馬軍步軍爲三衙印文篆書十都似是七都下七都蓋當時都皆有都指揮使副都虞候見葉夢得石林燕語此分設拱聖虞候之名目猶軍營立指揮使其下別爲五都而壯勇舊止三指揮後增至七是也此印乃宋初官

制爲史志所未詳可據以補史之闕略

右勾當公事之印山左金石志云舊藏曲阜顏教授

崇槩

家今贈同里孔

廣興

翁檢討

樹培

曰宋史職官

志勾當公事官二員以朝官充掌分左右廂檢計定奪點檢覆驗估剝之事屬三司使元豐官制行罷三司使歸戶部廣韻去聲五十一候句注云句當也俗作勾攷太祖時曹武惠王平江南回榜文有云江南句當公事及建炎時以避高宗嫌諱改句當爲幹辦如宣撫使官屬有幹辦公事官是也据此則是官設于宋初至南渡後不復有句當之名此殆北宋初年之官歟中溶案今所見宋官印自太祖端拱以後背皆有鑄造年月至眞宗咸平以後并有少府監字獨

此印皆無之豈猶在端拱之前耶

右印文亦曰勾當公事之印大小亦相似而篆法較前爲古而工整當亦宋初之物也而拓本背文有正隆六年八月汴少府監造正書款細審字小而模胡

又正隆乃金之紀元而云汴少府監造與宋金印制皆不合必是近時不學之徒僞添補鑿無疑

右宋桂州憑由司新朱記嘉興張叔未廷濟所藏背有正書款右曰淳化元年左曰十一月鑄鼻鈕上有

上字攷桂州本唐舊名宋仍之隸廣南西路紹興三年以高宗潛邸升爲靜江府宋史百官志言三司分置三使亦稱三部乃總國計貢賦之職元豐官制行罷三司並歸戶部其屬有都理欠司及都憑由司都理欠司判司官一人以朝官充掌理在京及天下欠負官物之籍立限以促之都憑由司以判都理欠司官兼掌在京官物支破之事凡部支官物皆覆視無虛謬則印署而還之支乞復據數送勾而銷破之又言催驅司掌京城諸司庫務末帳京畿倉場庫務月

帳憑由送勾及三部支訖內外奉祿之事又入內侍省有合同憑由司監官二人掌禁宣索之物給其要驗凡特旨賜予皆具名數憑由付有司準給云云然州郡並無設立憑由司明文此必宋初沿五代舊制置此官故云新朱記不知去於何時史志未詳賴此印流傳始可攷見而知之蓋史之闕略者不少矣

右歸遠弟弑指揮弟弑都朱記背有正書款二行右

曰淳化四年左曰□月鑄道光丁酉十月予在蘇城

武林徐問遠

楮

以印本見貽不知何人所藏印之形

制大小及篆文背款略與嘉慶己未翁宜泉所寄之
壯勇指揮印竝同攷歸遠之名亦起於宋初乃禁軍
也隸侍衛司宋史兵制載侍衛司所領步軍有歸遠
注云雍熙三年王師北征拔飛狐靈邱得其降卒立
咸平二年選諸州雜犯兵增之舊指揮三天聖中增
置爲十六此印鑄於淳化四年文所稱第一指揮弟
一都者當尙是飛狐靈邱降卒之指揮印也餘已詳
後壯勇印下

右壯勇第一指揮第五都朱記翁宜泉比部所藏己未九月十三日自都門寓書以印本寄示云背有款云淳化四年九月鑄印文首一字作𠂔翁君疑是壯字予以宋志所載指揮營號係勇字者逐一證之惟

壯字字形爲近蓋行書壯作壯與手有相侶繆篆遂誤片爲手耳攷舊五代史唐明宗紀長興三年三月以神捷神威雄武廣捷已下指揮改爲左右羽林軍置四十指揮每十指揮立爲一軍軍置都指揮使一人此指揮之名所自昉也宋制兵之在京師者爲禁軍分設諸州者爲廂軍大要以五百人爲一營每營立指揮使一員其下別爲五都每都馬軍設軍使一員副兵馬使一員步軍設都頭一員副都頭一員第營之多寡不一故指揮使等官亦無定數禁軍以殿

前司及侍衛兩司總之號爲三司武經總要云本朝沿唐五代之制並號禁軍黥面營處衣食公上草教日閱無得番休大凡百人爲都五都爲營五營爲軍十軍爲廂或隸殿前或隸兩侍衛司自廂都指揮使而下皆節級有員品每都立軍使都頭兵馬使則古之隊正之任也每營立指揮使則古之旅師之任也每軍立都指揮使都虞候則古之師帥之任也每軍每廂每弟立都指揮使則古之軍將之任也各有副箠以貳其政凡教旗人無常數大抵五百人爲一營

以營之多少分左右廂列次第建名號國朝軍制凡
五百人爲一指揮其前有五都每都一百人統一營
居之大陣凡一指揮以五百人準之皆軍校一員所
轄仍分隸五都又攷壯勇之名宋初惟禁軍有之隸
侍衛司以招獲羣盜配近京徒役者揀立咸平以後
遞有增補舊止三指揮至熙甯中始增至七此印造
於淳化四年文云壯勇第一指揮第五都朱記者蓋
禁軍壯勇營中之第一指揮下之第五都官所用朱
記其卽軍使都頭之流歟

右勇捷第四指揮弟式都記攷宋史兵志敘建隆以
來禁軍之制侍衛司步軍額有勇捷注云太平興國
四年征太原立分左右廂以諸州庫兵補左廂廣濟
開山兵補右廂指揮□十六襄邑九京澶陳壽汝曹

宿各一咸平西京南京毫甯洪河陰鞏長葛韋城各
一又敘熙甯以後之制步軍亦有勇捷注云左右二
十六襄邑北京漕陳壽汝曹宿各二咸平西京南京
毫甯陵虹河陰鞏長葛韋城各一云云則勇捷之名
創自宋初矣惟此印文於友人處見印本據以摹入
不知有年月款文否姑從其類列此印文記上無朱
字似非前印同時物又勇下似有二字下已漫漶疑
卽捷字之下半繆篆屈曲拖長也

右通泰等州巡茶鹽朱記背左右有正書款二行云
咸平五年十一月少府監鑄案宋史地理志通州中
軍事泰州上海陵郡本團練乾德五年降爲軍建炎
中二州皆爲金人所陷後復並屬淮南路熙寧五年

分淮南爲東西兩路通秦二州皆屬東路又百官志
少府監以朝官充掌造法鑄牌印諸記有鑄印篆文
官二人又宋置巡檢司掌巡捉私茶鹽等事又置監
當官掌茶鹽酒稅場務征輸及冶鑄之事諸州軍隨
事置官此其是也宋張舜民畫墁錄載熙甯中有一
朝士齊人知定平縣韓子華宣撫經由怪其縣印漫
汙因取觀之宰公遽前曰此印雖故非是本縣鑄造
子華曰何爲宰因指其陰題刻曰太平興國二年少
府以此知之子華顧幕府曰縣故正無有是也其所

言太平興國二年少府者卽印背所鐫少府監鑄造之款也又在此咸平五年之前廿五年計下訖熙甯中將百年矣故其印文磨滅不清當時上下皆漫爲此說不諳本朝掌故已屬可笑而浮休記其事於著述不加一語以辨正之何邪又攷唐書食貨志云初德宗納戶部侍郎趙贊議稅天下茶漆竹木十取一以爲常平本錢及出奉天乃悼悔下詔亟罷之及朱泚平佞臣希意興利者益進貞元八年以水災減稅明年諸道鹽鐵使張滂奏出茶州縣若山及商人要

路以三等定估十稅其一自是歲得錢四十萬緡然
水旱亦未嘗拯之也穆宗卽位兩鎮用兵帑藏空虛
禁中起百尺樓費不可勝計鹽鐵使王播圖寵以自
幸乃增天下茶稅率百錢增五十江淮浙東西嶺南
福建荆襄茶播自領之兩川以戶部領之天下茶加
斤至二十兩播又奏加取焉其後王涯判二使置權
茶使徙民茶樹於官場焚其舊積者天下大怨令狐
楚代爲鹽鐵使兼權茶使復令納權加價而已李石
爲相以茶稅皆歸鹽鐵復貞元之制武宗卽位鹽鐵

轉運使崔珙又增江淮茶稅是時茶商所過州縣有重稅或掠奪舟車露積雨中諸道置邸以收稅謂之搨地錢故私販益起大中初鹽鐵轉運使裴休著條約私鬻三犯皆三百斤乃論死長行羣旅茶雖少皆死雇載三犯至五百斤居僧舍僧保四犯至千斤者皆死園戶私鬻百斤以上杖背三犯加重徭伐園失業者刺史縣令以縱私鹽論廬壽淮南皆加半稅私商給自首之帖天下稅茶增倍貞元江淮茶爲大摸一斤至五十兩諸道鹽鐵使于粽每斤增稅錢五謂

之剩茶錢自是斤兩復舊又宋沈括夢溪筆談言本
朝茶法乾德二年始詔在京建州漢蘄口各置權貨
務五年始禁私賣茶從不應爲情理重太平興國二
年刪定禁法條貫始立等科罪濇化二年令商賈就
園戶買茶公於官場貼射始行貼射法濇化四年初
行交引罷貼射法西北入粟給交引自通利軍始是
歲罷諸處權貨務尋復依舊至咸平元年茶利錢以
一百三十九萬二千一百一十九貫爲額又云咸平
五年三司使王嗣宗始立三分法以十分茶價四分

給香藥三分犀象三分茶引云云則此印正立三分
法時鑄給也又李心傳朝野雜記總論東南茶法云
東南茶舊法官買官賣天禧三年合六榷貨務十三
山場所收茶錢十二萬緡除買茶本錢外止有息錢
三萬緡而已又言六榷貨務乃荆南府漢陽軍蘄州
蘄口無爲軍眞州海州也又云國朝鹽筴者舊有三
路解鹽行於關中東北鹽行于京東西畿甸東南鹽
行江淮東南鹽者通泰煮鹽也然則宋時通泰二州
皆爲出鹽之地又張邦基墨莊漫錄言通泰楚海四

州煮海之鹽諸書所言大率皆南宋時制此在宋初
蓋以茶鹽合諸一官巡之而云等州者蓋兼楚海二
州在內也夢溪筆談又云國朝茶利除官本及雜費
外淨入錢禁榷時取一年最中數計一百九萬四千
九十三貫八百八十五兩六十四萬九千六十九貫
茶淨利四十四萬五千二十四貫六百七十茶稅錢
通商後來取一年最中數計一百一十七萬五千一
百四貫九百一十九錢兩三十六萬九千七十二貫
四百七十一錢茶租八十萬九千三十二貫六百四

十八錢茶稅又言國朝六榷貨務十三山場都賣茶
歲一千五十三萬三千七百四十七斤半租額錢二
百二十五萬四千四十七貫一十云云可見宋時卽
茶稅之利已收括不少而未見其富後代鑒其失而
輕之亦未見其貧須知當國者但當於國家權其節
用之要不必多取於民以供繁費致傷國本也

右宣毅第五指揮使朱記背左右有正書款二行云
慶厯八年少府監鑄案宋史兵制宣毅軍隸侍衛司
康定初趙元昊反西邊用兵益募土兵爲就糧於是
京東西河北河東江淮荆湖兩浙福建路各募宣毅

大州二營小州一營凡二百八十人又云宣毅慶厯中京東京西河北河東淮南江南兩浙荆湖福建九路募健勇或選廂軍爲之指揮二百八十人與此鑄印之年正合惟攷宋制五百人爲一營設一指揮此印文言宣毅第五指揮使則宣毅有五營矣史言宣毅大州二營小州一營乃康定初制至慶厯時蓋又增至有五營者矣

右通道縣尉司記背左右有正書二行款云崇甯二年
□月少府監鑄案宋史地理志荆湖北路紹興二年
分治鄂尋治江陵其屬靖州下軍事熙甯九年收
後唐溪峒誠州其後建縣改移他屬不常崇甯二年

始改爲靖州縣三其一曰通道本羅蒙縣崇甯二年改則此印正改羅蒙爲通道時所鑄也又百官志云建隆三年每縣置尉一員在王簿之下則印文當止云通道縣尉印而云尉司者攷史言中興沿邊諸縣以武臣爲尉並帶兼巡捉私茶鹽礬亦或文武通差又言巡檢司有沿邊溪峒都巡檢或蕃漢都巡檢或數州數縣管界或一州一縣巡檢掌治甲兵巡邏州邑檢捕盜賊事又有巡捉私茶鹽等各視其名以修舉職業中興以後分置都巡檢使都巡檢巡檢州縣

巡檢然則尉司疑卽以縣尉而兼巡檢司者也通道
旣爲沿邊溪峒之縣未嘗別設巡檢故卽以縣尉兼
之耳後攷元豐九域志於梓州載尉司一曰永泰其
於尉司一下注云熙甯五年省梓州永泰縣爲鎮入
鹽亭縣十年置尉司又於永泰下注云州東一百三
十里三鄉大汴永豐二鎮又於忠州載尉司一曰南
賓尉司一下注云乾德六年以夔州龍渠鎮隸州開
寶二年置尉司南賓下注云州東南一百八十里二
鎮而忠州有縣四其一縣亦名南賓注云州南六十

二里三鄉則所稱尉司者皆設於縣鎮亦有所管鄉鎮似與縣尉不同而攷宋史地理志梓州後升改爲潼川府有縣九一曰永泰注云本尉司南渡後爲縣蓋尉司之官不多置故九域志所載祇有永泰南賓二處其後崇甯中改置通道縣亦嘗設此官而後代作史者不加細攷遂并失載其名耳一印之遺可以補史志之漏略故金石之文爲可貴也後覆閱今蘇州府學南宋理宗時所刻平江圖碑內載吳長洲二縣官署其附近縣署者止有縣丞廳主簿廳而於盤

門外附近教場載有吳縣尉司齊門外附近教場載有長洲縣尉司其所謂尉司似明卽縣尉也可見南宋時尉署並不附近縣署而攷宋初以巡捉私茶鹽等事屬之巡檢南渡以後改爲縣尉兼職故亦稱尉司歟

右恩州饒陽鎮酒稅務記背左右有正書款二行云

大觀三年二月少府監鑄汪秀峯工部

啟淑所藏也

案元豐九域志河北路恩州清河郡軍事縣三一曰
武城有饒陽等四鎮攷宋制掌茶鹽酒稅場務官謂

之監當官皆諸州軍隨事置設或置於城或置於鄉
鎮饒陽既爲武城縣之鎮印文不稱武城縣而稱恩
州可知其官統於州而非統於縣也又攷後漢書鮮
卑傳言熹平六年鮮卑寇三邊召百官議朝堂議郎
蔡邕議言武帝情存遠略志關四方南誅百越北討
強胡西伐大宛東并朝鮮因文景之蓄藉天下之饒
數十年官民俱匱乃興鹽鐵酒之利設告緡重稅之
令民不堪命起爲盜賊關東紛擾道路不通繡衣直
指之使奮鉞鉞而並出旣而覺悟乃息兵罷役章懷

注云武帝使東郭成陽等領天下鹽鐵敢私鑄錢賣
鹽者欽左指權專也官自賣酒人不得賣也是漢時
之酒曾與鹽鐵並起官賣至酒稅之例乃起於唐宋
代遂沿其制唐書食貨志云唐初無酒禁乾元元年
京師酒貴肅宗以稟食方屈乃禁京城酤酒期以麥
熟如初二年飢復禁酤非光祿祭祀燕蕃客不御酒
廣德二年定天下酤戶以月收稅建中元年罷之三
年復禁民酤以佐軍費置肆釀酒斛收直三千州縣
總領醕薄私釀者論其罪尋以京師四方所湊罷權

貞元二年復禁京城畿縣酒天下置肆以酤者斗錢百五十免其徭役獨淮南忠武宣武河東榷麴而已元和六年罷京師酤肆以榷酒錢隨兩稅青苗斂之大和八年遂罷京師榷酤凡天下榷酒爲錢百五十六萬餘緡而釀費居三之一貧戶逃酤不在焉昭宗世以用度不足易京畿近鎮麴法復榷酒以贍軍鳳翔節度使李茂貞方顯其利按兵請入奏利害天子遽罷之而攷雲麓漫抄云今之民間所納夏秋二稅蓋唐大中間取一年諸色科斂最重者定爲二稅則

諸色科斂已在其間後唐天成三年七月十三日勅
三京鄴都諸道州府鄉村人戶自今年七月後于夏
秋田苗上每畝納麴錢五文足陌一任造麴酒貨賣
則是再增酒麴錢矣又置坊戶以三年爲限限滿必
增錢實封投狀百日限滿折封給價高人上戶增價
攘奪泊其久也課高難辦又創力戶酒之稅將一坊
酒額盡均苗頭上舊坊戶既有醞具上戶亦有力造
酒酤賣五等下戶自令出錢數且零細家至戶到貽
害良農目今浙東湖北皆有斯解悉緣達官愛民之

虛名忘久遠之利病爲無窮之害予向在漢東偶有爲此舉力爭得免故書以告來者又建炎以來朝野雜記云東南酒課自祖宗時悉以留州慶厯二年秋祠部員外郎王琪始請增價其錢上京自後提舉司事司經制司發運司各因事增添又云蓋自軍興諸帥擅權酷利朝廷所仰茶鹽再紹興二十六年正月始詔諸軍撲買場務常平司拘收城郭酒店令總所拘收三十一年二月楊存中罷殿岩趙密代爲帥又上軍中及私家所買酒坊于戶部由是縣官始得以

佐經費至乾道間行在七酒庫日售錢一萬歲收本錢一百四十萬應錢一百六十萬麴錢二萬而歲額之外羨餘獻于內帑者又二十萬其後遂增加至五十萬緡遂爲常數云又有麴引錢云麴引錢者湖南路有之云云亦甚詳

右印辛酉七月得於金陵市上其文似是靈寶法師
之印六字背有陰款二行云天師真人法錄局給上
橫鐫政和三年四字似後補鑿也所謂天師真人者

乃傳漢張道陵之教世居江西之龍虎山宋時其教盛行今龍虎山尙多宋以前石刻攷李燾長編云崇甯四年五月賜信州龍虎山道士張繼元號虛靖先生漢張道陵之三十六代孫也張氏自是相襲爲山主傳授法籙者卽度爲道士且攷宋史當徽宗時蔡京當國惑於符瑞之說尊崇道教大觀二年班金籙靈寶道場儀範于天下政和三年詔冬祀大禮及朝饗景靈宮以道士百人執威儀前導又訪求天下道教仙經四年置道階三十六等六年置道學七年會

道士二千餘人于上清寶籙宮道籙院上章冊稱教
主道君皇帝重和元年又置道官二十六等道職八
等道士如王仔昔林靈素張虛白等並賜道號授眞
官一時羽士之盛可以想見其時朝廷旣立道籙院
龍虎山亦設法籙局鑄印分給道流以印符籙事或
可有故附存之六朝時已稱道士寇謙之爲寇天師
宋葉夢得避暑錄話云漢末五斗米道出於張道陵
今世所謂張天師者也又元史釋老傳言正一天師
者始自漢張道陵有其祖天師所傳玉印寶劔則天

師之號蓋由來久矣

乾隆癸卯歲瓜洲浚河得南宋官印六方其五皆冠以建炎字攷宋史輿服志云南渡之後有司印記多亡失尙方重鑄給之加行在二字或冠年號以別新舊故印有建炎字御營使司參贊軍事獨不繫年號者建炎元年始置御營司以宰相爲使執政爲副使侍從官兼參贊軍事前此未置此司無新舊之嫌也宋以諫議大夫爲諫官之長而司諫正言次之雖號兩省屬官而別爲職司其公署謂之諫院其印以諫官爲文則史所未及載乃知古人收藏官印於史學

不無助也彭芸楣尙書語予此六印得於土中破船底其旁有一刃刀鞘口有馬到成功四字周遭刻之芸楣視學江蘇時嘗以建炎六印賦試江浦韓生廷秀最擅塲芸楣猶能誦其警句韓予掌教鍾山所賞識士也丁未十一月九日觀安亭陳氏所藏摹本因攷其顛末書之時同觀者張子焱毛子際盛予子東壁東塾猶子東垣竹汀居士錢大昕及之甫識

余少嗜印章四十年來所見印譜及書畫鈐記自漢訖六朝公私諸印幾以千計而宋元印尤多然宋時

內府所用如玉瓢御寶乾卦員印希世藏方印希世
小印卽私印如賈氏悅生堂賢者而後樂此圖記不
數數見余以曾一見之爲快至兩宋官印流傳者罕
矣孫君芝佩持建炎時官印六方訪余玉峯寓館云
昔歲句曲鑿河得之泥沙中因藉以摹拓者印皆朱
文以周尺度之周廓不及二寸印文多有建炎字惜
寓齋無書未敢審定也嘗憶三朝政要賈似道軍十
三萬屯丁家洲一戰而潰督府之印皆失朱子亦云
南渡以來印信散失諸司往往借用舊印知徽欽北

狩後官印之沈薶者不可勝計矣芝佩雅好金銅玉
石之刻搜羅富而鑒別精若訪獲大宋中興之寶鎮
國神寶受命寶天子之寶天子信寶天子行寶皇帝
之寶皇帝信寶皇帝行寶大宋受命之寶定命寶光
堯德基雅善諸印雖白玉雙龍象牙素紐盤屈蛟螭
紅黃絨縑不可得見倘一一拓以相示呂擴聞見此
則余之所深望也膠城汪照新獲方于魯墨試漢罽
硯書此

宋自去東京青笠方北走九寶失其七官印復奚有

古人金銀章大抵青紫綬安置非一處流落亦不偶
如何敗蓬底團聚盤螭鈕豈若蘇季子纍纍繫腰肘
一朝辭泥淤六銅殊未朽呵護定有神沈埋固已久
朱文雖可讀佩此知誰某想當建炎初車駕渡京口
宰輔幸竄身司農困毒手爾時瓜步問舩艍應失守
問誰能殺敵取彼大如斗抑或皆致命忠義相先後
畢竟兩無徵焉知孰賢否但看摹拓本繆篆非蝌蚪
陳君劇嗜古疑義必析剖題識得鉅公傳觀署勝友
滿紙皆琳琅光怪見座右呵凍更披圖消寒比九九

卷一
三
○陳君槐江讀書金陵得所摹建炎六印攷據既精
錢官詹爲之題識一時賞鑑家署名甚多余爲作五
言古詩時丁未十二月望前雲間顧鴻志題於嚶城
學舍

癸卯秋少宗伯南昌彭公校士江甯彙攷古學課以
建炎遺印賦旋出印文徧示僚屬蓋於是年春瓜步
濬河得諸泥淖中印凡六顆濬河之官歸之宗伯宗
伯將以獻之 當二予時僑寓金陵獲拓本如數案
通鑑建炎三年二月金人粘沒喝陷天長軍內侍鄭

詢報于帝被甲乘騎馳至瓜州步得小舟渡江從行者止數人而是日金兵追至揚州揚子橋事起倉卒朝廷儀物盡皆委棄野航漫錄載宏治間揚子橋掘地得宋官印殆亦同時淪沒於此者與予維金人之南下也子女玉帛隨在得以飽其欲區區印記直土苴耳宋君臣之蒼黃奔竄也宗祏尙不耐保何暇及于印信之存亡乃薶沈七百年始逢 昭代鉅公之搢錄且得以供 睿鑒下至好事家往往摹拓其文以藏弄豈非物之顯晦自有定數而右文之世古來

吉金貞石固有不能匿其跡者耶書其端委志斯印之幸焉爾著雍涪灘圉余湖邨居士陳樹憲自識

槐翁舅氏讀書建康之明年寄余宋官印拓本六方舅氏之言曰印之失也以建炎三年二月今癸卯春瓜洲濬河獲于沙土中學使者彭公將以進於朝于是省中僚屬乞拓本于公余得之府學博錢師而苦其文漫漶不耐盡識吾子故肆力於六書者爲我一辨之余發而案其制其爲印者二方一寸九分弱一曰御營使司參贊軍事印一曰建炎諫官之印

檢宋史張浚傳浚嘗除御營參贊公事于建炎初又
趙鼎傳高宗初政鼎嘗擢右司諫然則此二印當爲
張魏公趙豐公故物也其爲記者四方一寸七分彊
一曰建炎宿州州院主當作朱記一曰建炎宿州軍資
庫記一曰建炎宿州糧料院記一曰建炎考城縣大
馮村指使記案宿州宋屬濠州今隸鳳陽府考城宋
屬南京應天府今隸歸德府當時守土之官遷轉無
常不知其爲誰何矣宋社南遷有司印記多亡失彼
遺此得各自收用尙方重鑄給之每加行在二字或

冠號年以別新舊然假借終不耐革州縣沿循甚至以縣佐而用東南將印以掾曹而用司寇舊章則向者宿州考城諸記又不知假何等職官也宋摹印多紕繆雖經祝溫柔蘇唐卿輩後先釐正而點畫究不耐一遵秦漢故制如糧之爲糧邨之爲村實爲譌體然兩宋官印流傳絕少況魏公豐公爲南渡名臣今之好事家得一前賢佩用之物往往繪圖成冊以資博攷矧其爲拜命之符乎其愛之重之又當何如予承舅氏之屬久無以報會少山汪丈歸自關中傾其

橐中所搜金石遺文畧予于馬鞍山下予因出是以
請審定而未暇也予歸窮一日之力以證明之質諸
舅氏未稔攷覈之當乎否乾隆丁未夏五月八日守
齋學人孫岱并書

槐江陳君得建炎六印拓本裝潢成冊宮簷外舅洎
孫君芝佩皆嘗爲之跋宮簷作跋時未詳州院爲何
官昨歲與予同檢羅氏新安志見其所列公署有州
院一條始知其爲刑獄之職蓋司理之流也嘉慶戊
午清明節介湯君雲樵假得此冊展貺旬日并書此

于後以補跋中所未及

予諦審州院一印記上實係朱字朱史謂州縣長官曰印僚屬日記京城及外處職司諸軍將校皆給朱記其制長一寸七分廣一寸六分初以木爲之南渡以後易之以銅如親賢宅益王府馬軍司統領官鄧恭慶王直講贊讀成都錢引務皆用銅朱記又予所見有端拱二年鑄拱聖下七都虞候朱記乾道六年湖州司理院新朱記及湖州司獄朱記監湖州都商稅務朱記湖州監在城酒稅務朱記皆是也孫君謨

釋作主故正之二月廿五日又識

乙丑九月見黃薨圖主政得宋本幼幼新書乃用紹興廿九三十等年呈狀廢紙所印其年月上印文有云潭州州院朱記又洪氏集驗方乃用淳熙七年八年官司簿錄所印其年月上印文有云紹興太平州州院朱記皆其證也後又讀宋史百官志府州後云諸曹官舊制錄事參軍掌州院庶務糾諸曹稽違則此印卽錄事參軍之印也又諸州有軍資庫詳見李心傳朝野雜記而史志無明文又史志言大府寺靖

康元年所隸官司二十有五。一曰糧料院。掌以法式頒廩祿。凡文武百官諸司諸軍奉料。以券準給。亦不言諸州設此官。而攷新編翰苑新書載監當官首曰州糧料院。并於事實下引神宗實錄。趙清獻公抃字閱道。監潭州糧料院。出納不限時日。槩量平人便之。又引胡宗愈傳。謚修簡。監楚州糧料院。伯父宿爲樞密副使。出守杭。陛辭。英宗問之曰。子弟誰可繼卿者。乎。宿以宗逾對。會曾公亮薦召試學士院。召除集校理。今宋史趙抃傳既不載監潭州糧料院。而胡宗愈

傳載宿對英宗語之上但云舉進士甲科爲光祿丞
亦無監楚州糧料院事可知當時各州有此官明矣
皆可補史之闕略張浚於建炎元年十二月以禮部
侍郎兼御營參贊軍事亦見宋史高宗紀又攷宋之
宿州隸淮南東路濠州隸淮南西路各自爲州不相
統屬孫君謂宿州宋屬濠州誤也又考城宋屬開封
府本隸拱州大觀四年廢拱州改隸開封亦非屬南
京應天府孫君之言未知何据考城縣有大馮邨及
指使之官皆不詳於史志而攷澠水燕談錄言慶厯

末妖賊王則盜據貝州賈魏公鎮北門倉卒遣將引
兵環城未有破賊之計有指使馬遂請入城殺之又
鶴林玉露引朱文公以書曉廖子晦爲小官遭長官
非理對移有云若對移作指使卽逐日執杖子去知
府廳前唱喏則指使亦明是一小官之名目也蓋宿
州先於建炎元年八月爲叛將李成所擾故軍資庫
等三官亦隨帝至揚而皆沒於瓜洲之難也又案野
航漫錄言都憲河閒張汝器宏治閒奉勅開濬漕河
於揚州揚子橋得舊印四枚其文一壽亭侯印一鎮

江府御前駐劄都統制印一鄂州管內觀察使印一
都巡檢使之印進於朝惟壽亭侯知爲關公餘不知
爲何時物時程篁墩過淮陰張以是質之程曰史稱
韓世忠嘗爲鎮江府御前駐劄都統制岳武穆嘗爲
管內觀察使此二印蓋宋物都巡檢亦宋官王捕賊
以守臣兼領今不注其職守所在莫知爲誰也後見
河南汲縣署前有五代梁開運二年石幢文所列官
銜姓名有云軍資庫官又有州院勾押官及止稱州
院者可知宋時所設官名大率相沿五代之制耳

右建炎後苑造作所印攷宋史職官志少府監下云
舊志判監事一人以朝官充凡進御器玩后妃服飾
雕文錯綵工巧之事分隸文思院後苑造作所又云
崇甯三年詔文思院兩界監官立定文臣一員武臣

二員竝朝廷選差其內侍幹當官竝罷分案四置吏
八所隸官屬五又內侍省下云後苑勾當官無定員
以內侍充掌苑園池沼臺殿種藝雜飾以備游幸又
云造作所掌造作禁中婚娶之名物則此印當卽後
苑造作所之印而崇甯旣罷內侍幹當官則此印當
卽文思院所隸屬官所用之印也印藏台州某氏道
光癸巳六舟受上人游錫所經訪知印得數紙攜歸
以之寄惠因補入焉印文首冠建炎年號當卽建炎
時更鑄與前瓜洲五印例同

右忠勇軍右近邊第二指揮第二都都虞候記攷李
心傳朝野雜記云忠勇軍者隆興中所創下福建江
東西浙東諸州招募屯於行在命李顯忠子師民等
統之靈璧之役遣隸都督府二年春併入步軍司又

宋兵志言熙甯時禁軍有忠勇云咸平五年以易州兵能擒賊者立指揮一成都又步軍忠勇注云成都而天禧間河北河東鄉兵亦有忠勇又建炎後諸屯駐大軍內及鄉兵皆有忠勇之名鄉兵注云關外西利階成鳳四州所聚此兵謂之忠勇印文云忠勇軍右近邊第二指揮第一都都虞候記當是建炎以後之鄉兵也利階成鳳四州皆係近邊故印文加近邊二字以別於他處之忠勇軍耳惟予見翁宜泉比部所藏淳化四年壯勇第一指揮第五都朱記及曲阜

孔氏所藏端拱二年拱聖下十都虞候朱記二印文
皆云朱記又第一都下虞候上不當重出都字爲可
疑此印篆文不甚佳而較小於宋時各印或非宋物
也

右宋紹興鹽官縣給納記背有正書款右云紹興七
年左文上已漫滅止鑄字可辨攷宋熙甯七年分兩
浙爲東西路後又合而爲一鹽官縣屬杭州南渡後
建都於杭升爲臨安府分臨安平江鎮江嘉興四府
吉安常巖三州江陰一軍爲西路紹興慶元瑞安三
府婺台衢處四州爲東路時臨安府屬縣七並升爲
畿鹽官乃其一也印文云紹興鹽官縣者宋史輿服
志云南渡之後有司印記多亡失尙方重鑄給之加
行在二字或冠年號以別新舊予嘗見乾隆癸卯歲

瓜州浚河所得南宋六官印其五皆冠以建炎二字
又黃蕘圖得宋本紹興間呈狀廢紙印幼幼新書上
有紹興潭州長沙縣印及善化縣印又淳熙間太平
州官司簿錄印洪氏集驗方上有紹興太平州州院
朱記皆與此同其所云給納者攷百官志戶部倉部
郎中元祐元年四月分案六一曰給納又總領屬官
云湖廣有給納場注云屬官兼而於置縣丞下又有
應給納常平免役之語蓋收放貨稅所用之印信也
此史志所未詳可以補其闕漏者据後十年所鑄單

州團練印則背款鑄字上所漫滅者當是文思院三字

右單州團練使印嘉興張叔未藏背有正書款右曰
紹興十年左曰文思院鑄鼻鈕上有上字攷元豐九

域志熙甯七年分京東路爲京東京西二路單州屬西路本碭郡建隆元年升爲團練宋史職官志凡車輦飭器印記之造則少府監文思院隸焉建炎併歸工部少府監旣歸工部文思院上下界監官並從本部辟差又言文思院隸工部提轄官一員監官三員內置一員文臣京朝官充監門官一員掌金銀犀玉工巧及采繪裝鈿之飾凡儀物器仗權量輿服所以供上方給有司者於是出焉又言少府監凡進御器玩后妃服飾雕文錯綵工巧之事分隸文思院後苑

造作所本監但掌造門戟神衣旌節郊廟諸壇祭玉
法物鑄牌印諸記百官拜表案褥之事又言文思院
掌造金銀犀玉工巧之物金采繪素裝鈿之飾以供
輿輦冊寶法物凡器服之用又言鑄印篆文官二人
又言隆興初百工器用屬之文思院据此與後忠州
團練使二印皆云文思院鑄則知南宋紹興以後鑄
印之事專隸文思院而非少府監矣史志之言尙未
明晰也團練使詳後

右忠州團練使印背左右有正書款二行云乾道三年文思院鑄攷元豐九域志夔州路本忠州南賓郡事宋史地理志作咸洎府云咸洎元年以慶宗潛邸升爲府此印鑄於南宋孝宗時故尙稱忠州耳又廣

南西路邕州羈縻州內亦有忠州此當是夔州之忠州也又攷翰苑新書引唐職林職略言肅宗乾元中置團練使守捉使大領十州小三五州代宗時元載當國令刺史悉帶團練使本朝沿舊制置諸州團練使而攷宋史職官志言防禦使團練使諸州刺史無定員靖康元年臣僚言遙郡正任恩數遼絕自遙郡遷正任者合次第轉行今自遙郡與落階官而授正任直超韓本等正官是皆姦巧希進躡取乞應遙郡承宣使有功勞除正任者止除正任刺史從之凡未

落階官者爲遙郡除落階官者爲正任朝謁御宴惟正任預焉遙郡並止本官敘正任復次第轉行考之舊制梯級有差中興以後節度移鎮寢少後有一定不易經遷太尉承宣觀察徑作一官及遙郡落階官又就除正任紹興末臣僚以爲言雖復置檢校官餘未盡改又攷孝宗本紀紹興三十二年十一月庚子以蕭鵬巴爲忠州團練使是時川蜀正爲金人蹂躪則忠州團練使印或至乾道三年時因失去而復鑄耳此印乾隆中出武林西溪山中爲趙晉齋所得後

又歸吳門袁壽階

右印文曰湖州司理院新朱記嘉慶初予在吳門見
吾友士禮屈主人黃堯圃丕烈得宋板程俱北山小
集皆用湖州乾道六年官司申州狀牒紙背刷印予

假摹其印文凡七種此其一也攷宋史地理志兩浙路南渡後分爲東西兩路湖州吳興郡寶慶元年改安吉州此在乾道時故猶仍舊名稱湖州又職官志言諸州諸曹官舊制錄事參軍掌州院庶務糾諸曹稽違戶曹參軍掌戶籍賦稅倉庫受納司法參軍掌議法斷刑司理參軍掌獄訟勘鞠之事乾道以來閒以司戶當卽戶曹兼司法知錄當卽錄事亦或兼職六年汪大猷言司戶初官令專主倉庫知錄依司理例以獄事爲重不當兼他職從之又攷翰苑新書云開寶六年

始置諸州司寇參軍以進士及選人爲之後改司理
掌獄訟勘鞫之事不兼他職案此印用於申狀年月
上其下署銜姓名云右迪功郎司理參軍某人攷宋
制初以迪功郎爲文散官階之最小者其後則謂之
寄祿官以階易官職官志云元豐三年八月下詔肇
新官制省臺寺監領空名者一切罷去而易之以階
九月詳定所上寄祿格初新階尙少而轉行者易以
及元祐初於朝議大夫六階以上始分左右旣又以
流品無別乃詔寄祿官悉分左右詞人爲左餘人爲

右紹聖初罷之崇甯初以議者有請自承直至將仕郎凡換選人七階大觀初又增宣奉至奉直大夫四階政和末自從政至迪功郎又改選人三階於是文階始備紹興初行元祐故事以左右二字分別流品其後以人言省去又攷琴川志引哲宗舊實錄云元祐四年十一月三省言承務郎以上至朝請大夫欲分左右進士加左字餘官加右字從之然則史所謂詞人乃進士也此爲司理參軍者稱右迪功郎可知非進士而爲無出身人矣予旣摹此以下七印適友

人杭州何夢華

元錫

見之錄其文攜去後据以採入

兩浙金石志所言皆未明晰故爲詳攷而表出之職
官志言元豐寄祿格以階易官新官迪功郎乃崇甯
將仕政和再換舊官卽軍巡判官司理司法司戶主
簿尉正與此合

右印文曰湖州司獄朱記亦見宋板北山小集乾道六年申狀紙之年月上其下署銜姓名云左修職郎錄事參軍某人錄事參軍已詳前跋据宋史職官志言乾道以來間以司戶兼司法知錄亦或兼職六年從汪大猷言知錄依司理例以獄事爲重不兼他職而据翰苑新書引職略云政和三年改錄事爲司錄奉旨參軍改爲掾建炎初復舊名今申狀正在乾道六年而稱錄事不稱知錄可知改錄事爲知錄又係乾道六年以後之事史据其後來之名爲稱耳又攷

諸州司獄一官職官志竝未特標其名今据用此印之狀其銜止列錄事參軍一人可知此印卽係錄事參軍之印因其以獄事爲重故特著其文於印爲司獄也若不見此狀而但見印文幾疑宋代別有司獄之官而爲史所脫收矣故學者貴於博覽多見庶不致有望文生議之誤可不懼哉惟予前跋瓜洲開河所得南宋初六印有建炎宿州州院朱記据新安志列公署有州院又宋板書用紹興年間呈狀印紙有潭州州院朱記又有用淳熙年間官司簿錄印紙有

紹興太平州州院朱記以爲卽錄事參軍之印今據此印稱司獄其署銜明是錄事參軍與前之紹興後之淳熙間皆不同豈諸州有大小之別而錄事參軍之印亦有異者歟并疑而識之又據史言修職郎乃選人三階之一係無出身者而上加左而非右則與進士加左字之說又不合亦可疑者也餘詳後職官志言元豐寄祿格以階易官新官修職郎崇甯登仕政和再換舊官卽知錄參軍知縣今正與此合

右印文曰監湖州都商稅務朱記亦見宋板北山小
集乾道六年申狀年月紙上其狀前有某日收到商
稅課利官錢若干貫若干文省須至申云云年月日
後列右迪功郎監都稅務某人從義郎監都商稅某

人攷宋史食貨志云商稅凡州縣皆置務關鎮亦或有之大則專置官監臨小則令佐兼領諸州仍令都監監押同掌又職官志云監當官掌茶鹽酒稅場務征輸及冶鑄之事諸州軍隨事置官其征榷場務歲有定額歲終課其額之登耗以爲舉刺凡課利所入日具數以申于州建炎初詔監官中闕許轉運司具名奏辟一次以二年爲任方許關升焰劇去處許添差一員合選差文臣更不差武臣淳熙二年詔二萬貫以下庫分選有才幹存留一員指揮諸班直親從

親事官保義郎以下差充建炎四年詔各州每以五員爲額据此列銜有文武二員迪功郎乃文臣從義郎乃武臣史志言寄祿官武階新官從義郎舊官卽東頭供奉官然則此武臣一員蓋內官文臣一員蓋以令佐兼領卽簿尉等官故階爲迪功郎卽所謂諸州仍令都監監押同掌是也而皆所謂監當官也又此狀所云某日收到商稅課利官錢若干者卽所謂凡課利所入日具數以申州是也

右印文曰湖州戶部贍軍酒庫記亦見北山小集乾
道六年申狀年月紙上其狀前云某日收到官錢或
當稅官錢若干則後列忠翊郎監都酒務某人武翊
大夫監都酒務某人若狀前云賣酒收到課利錢若

干則後列右迪功郎監戶部贍軍酒庫某人承信郎
監戶部贍軍酒庫某人攷權酒贍軍之名起於唐末
見唐書食貨志而翰苑新書引紀年錄云紹興八年
十一月戶部尙書章誼請置贍軍酒庫于行在命司
農寺丞蓋諒主之賜浙東總制錢五下有脫字緡爲釀本
其後歲收息錢五十萬緡又宋史職官志言戶部凡
本部檢法之事有三一曰課利掌諸軍酒庫比較增
虧知通等職官姓名人戶買撲鹽場酒務租額酒息
賣田投納牙契又言紹興十一年置總領以朝臣爲

之其序位在轉運副使之上鎮江諸軍錢糧淮東總
領掌之鄂州荆南江州諸軍錢糧湖廣總領掌之建
康池州諸軍錢糧淮西總領掌之其淮東西湖廣並
有贍軍酒庫又攷琴川志言戶部酒坊四名以贍軍
吏部揭闕入版曹而兩浙漕臣領其事月解諸漕司
輸課雖不繫于縣然私釀犯禁縣得理焉又攷職官
志言寄祿官武階新官忠翊郎舊官卽右侍禁新官
武翊大夫舊官卽供備庫使而史志誤翊爲翼又新
官承信郎舊官卽三班借職据此狀列銜則知當稅

官錢等皆內武臣監都酒務之官兼領之而有二人其賣酒課利錢之贍軍酒庫乃以文武各一員分主之而所稱右迪功郎者當亦卽以簿尉等兼領也宋制列銜敘官皆左行以在後者爲大故武翊大夫列忠翊郎之後而承信郎爲內武臣列於簿尉迪功郎之後也

右印文曰湖州監在城酒務朱記亦見北山小集乾
道六年申狀年月紙上其狀式列銜竝與前用湖州
戶部贍軍酒庫記者同攷宋權酤之法諸州城內皆
置務釀酒縣鎮鄉間或許民釀而定其歲課若有遺

利所在多請官課具詳宋史食貨志据琴川志言本
府酒坊五許民間買撲或郡自遣吏給本措置課入
輸郡馬軍司酒坊二殿司馬軍出戍金陵軍中自遣
牙校莅酒政亦許民間買撲以上諸酒坊課額盈虧
皆不繫縣各分疆界彼此酒不越境境內或有私釀
則訴諸縣縣爲懲治而已餘已詳前

右烏程縣印烏字已漫滅故闕之亦見北山小集乾
道六年申狀紙之年月上其狀前逐列某人等某月
日理某事年月下又列銜位姓名云右迪功郎縣尉
主管學事某人右修職郎主簿主管學事某人右承

務郎知縣丞主管學事賜緋魚袋某人右通直郎知縣主管學事勸農公事某人攷宋史地理志兩浙路南渡後又分東西二路湖州屬西路領縣六首曰烏程宋代官制每縣知縣以下丞與簿尉或增置或省罷時有更易又宋初縣四百戶以上以令知丞簿事四百戶以下以丞簿兼令事南渡後縣或置丞則以簿兼丞之事具詳宋史職官志其知州知縣則皆帶勸農公事志言紹興五年帝以守令皆帶勸農公事多不奉職自今有治效顯著者可令中書省籍記姓

名特加擢用十三年詔依舊制帶提舉或主管學事
從官以上稱提舉餘知通主管淳熙中罷而据琴川
志云崇甯二年行三舍法諸縣令丞簿尉竝帶主管
學事宜和三年罷紹興十三年復帶淳熙三年不入
銜則此在乾道間故皆以主管學事列入銜中也而
勸農公事見於石刻惟知州通判知縣帶之故丞以
下皆無耳又据志敘紹興以後階官通直郎承務郎
竝列京官八階之內而從政郎修職郎迪功郎三階
云政和更定竝係選人用舉狀及功賞改官又言寄

祿官新官通直郎舊官卽太子中允贊善大夫洗馬
新官承務郎舊官校書郎正字將作監主簿則此令
與丞皆當以京官爲之京官多進士而此稱通直郎
承務郎與簿之修職郎尉之迪功郎俱詳於前皆無出身
之人上通加右而不分左則與史言詞人爲左琴川
志言進士加左字之例又不合何邪餘詳前又史志
載文官三品已上服紫五品已上服緋九品已上服
綠而攷承務郎乃從八品又係縣丞獨云賜緋魚袋
蓋出於特恩也惟据琴川志載縣丞題名自紹興十

年以後至乾道六年銜內多有賜緋字而其前後則皆不見蓋又一時之制而爲史志所未詳者

右歸安縣印亦見北山小集乾道六年申狀之年月上其狀文及所列尉簿丞令銜位大略相同攷宋史

地理志湖州領縣六第二卽歸安云太平興國七年
析烏程地置縣

右均州防禦使印背有正書款右曰淳熙十年左曰
文思院鑄柄有上字据宋史地理志言京西南路均

州上武當郡武當軍節度本防禦乾德六年移入上
州防禦宣和元年賜軍額則此印鑄於南宋淳熙時
似不當更稱防禦使矣攷宋人翰苑新書据通鑑唐
書唐職林職略等書言唐武后聖歷九年以夏州鎮
領防禦使防禦使之名自此始開元二年薛訥爲隴
右防禦使本朝沿唐制置諸州防禦使予攷宋制諸
州有升節度防禦團練使三等者而節度爲最貴史
言宣和末節度使五六十人議者以爲濫中興諸州
升改節政鎮凡十有二則均州在宣和初雖嘗升防

禦爲節度蓋至南渡後仍改爲防禦故有此印也特
史志未加細攷而失之耳又攷後理宗端平二年乙
未元太宗伐宋拔棗陽徇襄鄧入郢徙鄧與均唐三
州民於雒陽西三縣鄧治長水均治永甯唐治福昌
則此印必在其時遺失沒入土中久而復出反得流
傳至今者歟印爲海昌六舟上人藏後以贈予

集古官印攷

卷十五

三

右印藏吾鄉靜春堂金氏金本予世親家藏古銅印
數百方其先曾集爲卧游齋古銅印譜十二小冊未

行於世故人無知者樂圃丈名以埏中乾隆甲午鄉
榜後得校官未赴任蒙以家所存印譜一部見說內
有此印釋曰神霄玉府云鼻鈕又云上鐫皇宋寶祐
甲寅楊清臣奉行予謂此印亦似道流所用案其文
似是蟲鳥篆不能識而其所釋四字又不知從何處
得之屢向丈之哲嗣堅齋廣文元鉅索觀則云印不
知從何時失去矣殊爲悵然

集古官印攷

卷十五

奎

右印文大略與前印同而無年月等款丁酉六月於
吳門吳靜軒上舍

志恭

處見之

右招撫史司之印海甯吳槎客

鑄

所藏攷宋史百官

志招撫史不常置建炎初李綱秉政以張所爲河北

招撫使未及出師而廢紹興十年劉光世爲三京招
撫使踰年而罷三十二年孝宗卽位以成閔張子蓋
李顯忠三大將爲湖北京西淮東西招撫使子蓋死
劉寶代之未幾結局官吏並罷開禧二年山東及京
東西北路並置使招撫後皆罷之則招撫使上並當
有路名此印但云招撫使司背又無鑄造年月等款
可定姑附於此

右甯晉引納朱記吳門黃君堯圖所得出以見示其
制長而背無款据印文稱朱記則似亦宋物也攷宋
史地理志河北路慶元府有甯晉縣則此或是甯晉

縣收納鈔引等所用之記卽縣官所鑄與諸官印頒
自朝廷者不同故長而無鑄造之款

右永定關稅新記其大小形制與前印無少異背亦

無款據予所見宋官印有稱新朱記者則此文云新記蓋卽新朱記之類取其以六字相配故去朱字亦未可定攷元豐九域志廣南西路橫州有永定縣云開寶五年廢蠻州以永定縣隸州熙甯四年省入甯浦宋史地理志云元祐三年復置後更名永淳則此縣爲蠻夷出入之邊境或因此設關而收其稅乃鑄此印也此亦縣官自鑄故形制與官印不同背亦無鑄造年月等款

右提舉城隍司印山左金石志作宋官印然無權据
且字上有六星恐是道家所用攷城隍二字本周易
城復於隍其建祠立象奉爲神明則矧於孫吳赤烏

時北史載慕容儼鎮郢城梁兵來攻禱於神名城隍者遂以破梁又隋書五行志梁武陵王紀言祭城隍神蛇繞牛口至唐以後見於載籍者不可勝舉矣則此印必非近代物也